

四庫全書

史部

欽定四庫全書

史部

夢梁錄卷

十八至
二十

詳校官鴻臚寺少卿臣梁業陽

編修臣程嘉謨覆勘

總校官原任中允臣王燕緒

校對官中書臣袁文邵

膳錄監生臣康傑

欽定四庫全書

夢梁錄卷十八

宋 吳自牧 撰

民俗

杭城風俗凡百貨賣飲食之人多是裝飾車擔盤盒器皿新潔精巧以耀人耳目蓋效學汴京氣象及因高宗南渡後常宣喚買市所以不敢苟簡食味亦不敢草率也且如士農工商諸行百戶衣巾裝著皆有等差香鋪人頂帽披背子質庫掌事裹巾著皂衫角帶街市買賣

人各有服色頭巾各可辨認是何名目人自淳祐年來
衣冠更易有一等晚年後生不體舊規裏闕巾異服三
五為羣鬪美誇麗殊令人厭見非復舊時淳朴矣但杭
城人皆篤高誼若見外方人為人所欺衆必為之救解
或有新搬移來居止之人則隣人爭借動事遺獻茶湯
指引買賣之類則見睦鄰之人又率錢物安排酒食以
為之賀謂之煥房朔望茶水往來至于吉凶等事不持
慶弔之禮不廢甚者出力與之扶持亦睦鄰之道者不

可不知

戶口

杭城者為都會之地人煙稠密戶口浩繁與他州外郡不同姑以自隋唐朝考之是時隋戶一萬五千三百八十唐貞觀中戶三萬五千七十一口一十五萬三千七百二十九唐開元戶八萬六千二百五十八宋朝太平寰宇記錢塘戶數主六萬一千六百八客八千八百五十七九域志主一十六萬四千二百九十三客三萬八

千五百二十三中興兩朝國史該戶二十萬五千三百
六十九乾道志戶二十六萬一千六百九十二口五十
五萬二千六百七淳祐主客戶三十八萬一千三十五
口七十六萬七千七百三十九咸淳志九縣共主客戶
三十九萬一千二百五十九口一百二十四萬七百六
十錢塘仁和兩赤縣乾道志主客戶該十萬四千六百
六十九口該一十四萬五千八百八淳祐志戶該一十
一萬一千三百三十六口三十二萬四百八十九咸淳

志兩赤縣城主客戶一十八萬六千三百三十口四十
三萬二千四十六自今而往則歲閏月長殆未易以算
數也

物產

穀之品

杭早占城	紅蓮	礪泥烏	雪裏盆	赤稻黃	秈
米	杜糯	光頭糯	蠻糯	大麥小麥	麻赤白烏
黃豆	大黑	大紫	大白	大黃	大青白扁

黑扁 白小 赤小 菜豆 小紅樓子菜 青豌豆
白眼 羊眼 白江 白豌豆 刀豆 粟 狗尾 金
罌

絲之品

綾柿蒂 狗蹄 羅花素 結羅 熟羅 線佳 錦
內司街坊以絨背為佳 尅絲花素二種 杜綢又名
起線 鹿胎次名透背皆花紋特起色樣織造不一
紵絲染絲所織諸顏色者有織金閃褐間道等類 紗

素紗 天淨 三法暗花紗 粟地紗 茸紗 絹官
機 杜村唐絹幅闊者密畫家多用之綿以臨安於潛
白而洒密者佳 紬有綿線織者土人貴之

泉之品

桑 柘 麻 苧

貨之品

茶 寶雲茶 香林茶 白雲茶 又寶嚴院垂雲亭
亦產東坡以詩戲之云妙供來香積珍烹具大官揀芽

分雀舌賜茗出龍團蓋南北兩山七品諸山皆產徑山
採穀雨前茗以小缶貯饋之

鹽 涉鎮 仁和村 鹽官 浮山 新興 下管上
管 蜀山 岩門 南路茶槽等場嘗產之地漢置鹽
官吳王濞煮海為鹽之地

蜜 蠟 紙 餘杭由拳村出藤紙富陽有小井紙赤
亭山有赤亭紙

菜之品

諺云東菜西水南柴北米杭之日用是也臺心矮菜矮
黃大白頭小白頭夏菰黃芽冬至取巨菜覆以草即久
而去腐葉以黃白纖瑩者故名之芥菜生菜菠菱菜蒿
菹苦蕒葱薤韭大蒜小蒜紫茄水茄梢瓜黃瓜葫蘆漱
名冬瓜瓠子芋山藥牛蒡茭白蕨菜蘿蔔甘露子水芹
蘆筍雞頭菜藕條菜 薑薑芽新薑老薑 茵多生山
谷名黃耳菌東坡詩云老楮忽生黃耳蕈故人兼致白
芽薑蓋大者淨白名玉蕈黃者名茅蕈赤者名竹孤若

食須薑煮薑勿黑食

果之品

橘富陽王洲者佳 橙有脆綿木 梅有消便糖透黃

桃有金銀水蜜紅穰細葉紅餅子 李有透紅蜜明

紫色 杏金麻 柿方頂牛心紅柿 柿牛妳水柿火

珠步檐麵柿 梨雪縻玉消陳公蓮蓬梨賞花甜霄砂

爛 棗鹽官者最佳 蓮湖中生者名綉蓮尤佳 瓜

青白黃等色有名金皮沙皮蜜甕等筒銀瓜 藕西湖

下湖仁和護安村舊名范堰產扁眼者味佳菱初生

嫩者名沙角硬者醃醃湖中有如栗子樣古塘大紅菱

林檎鄔氏園名花紅郭府園未熟時以紙剪花樣貼

上熟如花木瓜嘗進奉其味蜜甜枇杷無核者名椒

子東坡詩云綠暗初迎夏紅殘不及春魏花非老伴盧

橘是鄉人木瓜青色而小土人剪片爆熟入香藥貨

之或糖煎名燒木瓜櫻桃有數名稱之淡黃者甜

石榴子顆大而白名玉榴紅者次之楊梅亦有數種

紫者甜而頗佳 葡萄黃而瑩白者名珠子又名水晶

最甜紫而瑤瑤色者稍晚 雞頭古名又名雞頭

壘平聲

錢塘梁諸窰頭仁和藕湖臨平湖俱產西湖生者佳却

產不多可篩為粉 銀杏 栗子 甘蔗臨平小林產

以土截至春夏味猶不變小如蘆名荻蔗亦甜

竹之品

竹碧玉間黃金筍淡紫斑金苦方竹鶴膝貓頭竹筍有
數名日南路白象牙哺雞貓兒頭黃鶯晚篁皆即涼筍

和靖有煙崖早筍肥之句又有紫筍邊筍

木之品

桑數種名青桑白桑拳桑大小梅紅雞爪等類 梓木

中王 柘 栢 派山陳朝最古 松惟天目者斜短穉

健 栝子三針華山四針 桐檜 楠東坡詩云中和

堂後古楠樹與君對床聽雨聲 櫨 櫟 槐 杉

桂 檀 楫 楓 榆 柳金湖堤最盛垂者名楊長

條可玩 棕名栢欄筍可蒸煨味微苦太冷 青神

鳳集目奇者名之

花之品

牡丹有數種色樣又一本冬月開花詩云一朵嬌紅翠
欲流春光回報雪霜羞韓文公詠牡丹詩幸自同開俱
隱約何須相倚鬪輕盈凌晨併作新粧面對客偏含不
語情雙燕無機還拂掠遊蜂多思正經營長年是事都
拋盡今日闌邊眼暫明石曼卿詩獨步性兼吳苑艷渾
身天與漢宮香李山甫詩邀勒春風不早開衆芳飄後

上樓臺數苞仙艷火中出一片異香天上來曉露精神
妖欲動莫煙情態恨成堆知君已解相如薄斜凭闌干
首重迴又嫵黃妖紫間輕紅穀雨初晴早景中靜女不
言還愛日絲雲無定只嫌風爐烟坐覺沉檀薄粧面回
看粉黛空此別又須經歲月酒闌把燭遶芳叢有一種
秋開牡丹誠山詩咏云白帝工夫縷絲霞肯將顏色弄
韶華酒粘織女秋衣薄風動姮娥寶髻斜霜露莫摧今
日藥輪蹄多看異時花陰陽多苦栽培地不趁春風有

幾家 芍藥有早緋玉綴露千葉白者佳 梅花有數
品綠萼千葉香梅東坡和秦太虛云西湖處士骨應槁
只有此詩君壓倒又詩云江頭千樹春欲暗竹外一枝
斜更好林和靖詩二首吟懷長恨負芳時為見梅花輒
入詩雪後園林纔半樹水邊籬落忽橫枝人憐紅艷多
應俗天與清香似有私堪笑胡雛亦風味解將聲調角
中吹又衆芳搖落獨暄妍占斷風情向小園疎影橫斜
水清淺暗香浮動月黃昏霜禽欲下先偷眼粉蝶如知

合斷魂幸有微吟可相狎不須檀板共金尊戴石屏詠
梅韻曰瀟洒春葩縞壽陽百花惟有此花強月中分外
精神出雪裏幾多風味長折向書窗疑是玉吟來齒頰
亦生香年年茅舍江村畔勾引詩人費品量王介甫詠
曰頗怪梅花不肯開豈知有意待春來燈前玉面披香
出雪後春容取勝回觸撥清詩成走筆淋漓紅袖起傳
盃望塵俗眼那知此只買天桃艷杏栽潘紫巖詠曰柴
門盡日少蹄輪坐對橫窗數點春心向雪中偏暴白影

來月上亦精神十分洗盡鉛華相百劫修來貞潔身笑
殺唐人風味短不應喚作弄珠人又咏落梅詩曰一夜
風吹恐不禁曉來零落已駸駸忍看病鶴和苔啄空遣
飢蜂遶竹尋稚子躊躇看不埽老夫索寞坐微吟窗前
最是關情處拾片慙慙玩掌心楊元素落花詩曰夜來
經雨學啼妝今日摧紅怨夕陽已落旋隨春水急強留
還怯晚風狂應將別恨憑鶯語更把歸期趁蝶忙誰謂
多情消不得夢寬猶惜滿闌香更諸賢詠梅詩曰木落

山寒獨占春十分清瘦轉精神雪疎雪密花添伴溪淺
溪深樹寫真三弄笛聲風過耳一枝筇影月隨身吟蒐
欲斷相逢處恐是孤山隱逸人韓偓梅花詩云北陸候
纔變南枝花已開無人同悵望把酒獨徘徊凍月雪為
伴寒香風是媒何因逢越使腸斷謫仙材東坡和楊公
濟詩云綠髻尋春湖畔回萬松嶺上一枝開學士任希
夷宿直玉堂賦梅邊小池詩云眼見梅花照玉堂只將
濃綠覆宮牆虬枝偃蓋雲千疊下蔭清池玉一方紅

梅有福州潭州紅柔枝千葉邵武紅等種東坡詩云寒
心未肯隨春態酒暈無端上玉肌周必大在祕書省館
中次洪邁紅梅韻詩云紅羅亭深宮酒遲宮花四面誰
得知

南唐內苑中有紅羅亭
四面專植紅梅見雜志

蓬山移植自何世國色含

酒紛滿枝初疑太真欲起舞霓裳拂拭天然姿又如東
家窺牆女施朱映粉尤相宜不然朝雲頽薄怨自持似
對襄王時須臾臙脂著雨落整妝俯照含風漪遊蜂戲
蝶日採掇嗟爾何異氓之蚩提壺火急就公飲他日墮

馬空啼眉周必大在祕書省著庭中詠綳梅詩云繭黃
織就費天機傳與園林晚出枝東觀奇章承詔後南昌
故尉欲仙時芳心向日重重展清馥因風細細知詩志
品題猶誤在紅梅未是獨開遲 臘梅有數種檀心磬
口者佳東坡詩有蜜蜂采花作黃蠟之句又詩云萬松
嶺上黃千葉玉蘂檀心兩奇絕周必大詠黃蠟梅在省
中次王十朋韻化工未幻醪釀菊先放綳梅伴羣玉幽
姿著意添鉛黃正色向心輕萼綠粧成自銜風味深對

此寧辭食無肉方憐涪翁被渠惱中氣悔屏盃杓醪

碧蟬 棠棣 金林檎 郁李 迎春 長春 桃花

有數種單葉千葉餅子緋桃白桃 杏花 玉簪 水

仙 薔薇 寶相 月季 小牡丹 粉團 徘徊貴

官家以花片製作餅兒供筵 佛見笑 聚八仙 百

合 滴滴金 石竹和靖詩云深枝冉冉裝谿翠碎片

英英剪海霞 木香 酴醾二種有白而心紫者亦有

黃色俱香馥馥然可愛者省中種黃梅在酴醾側黃魯

直戲答王觀復醖醖詩云誰將陶令黃金菊幻作醖醖

白玉花 櫻桃花 萱草 梔子 蜜友 金燈 金

沙 山丹 真珠又名醖水青條白藥燦然可翫 剪

紅羅 錦帶 錦堂春 笑厭面 大笑 金盞盃

菊品最多有七十餘種 荷花紅白色千葉者西湖荷

蕩邊風送荷香馥然白樂天有遠郭荷花三十里之句

屬官楊萬里在西府直舍詠盆池種荷詩二首曰飛空

天鏡墮莓苔玉井移蓮盆內栽坐看一花隨手長挨開

半葉出頭來稍添茭苻相縈帶便有龜魚數往迴刺欲
遶池三兩匝數聲排馬苦相催又曰西府寒泉汲十尋
深澆淺洒碧森森高花已照紅粧鏡小藥新抽紫玉簪
鈿破尚餘折雨恨繖疎遶作半池陰西湖瘦得盆來大
更伴詩人恐不禁 瑞香種頗多大者名錦薰籠東坡
詩云幽香結湘紫來自孤峯雲骨香不自知色淺意殊
深 紅辛夷 蕙 東坡題楊次公詩蕙本蘭之族依
然臭味同曾為水仙佩相識楚詞中 蘭東坡詩云春

蘭如美人不採羞自獻時聞風露香蓬艾深不見 紫
薇花東坡詩曰虛白堂前合抱花秋風落日照橫斜後
省有此花任希夷詠曰清曉開軒俯鳳池小山經雨石
增輝琉璃葉底珊瑚畔立出池邊是紫薇 紫楊 紫
荊花 雞冠有三色 鳳仙 杜鵑 蜀葵有二種
黃葵 映山紅花 金銀蓮子花 嬰粟 櫻桃花唐
時樟亭驛種雙樹樂天詩云南館隹軒兩樹櫻春條長
定夏陰成素華朱實今雖盡碧葉風來別有情 七里

香 橙花 榴花有數種單葉千葉色有數色項唐時

孤山有此花白樂天詩云山榴花似結紅巾容艷新妍
占斷春色相故開行道地香塵悔觸坐禪人 木犀有

黃紅白色者其香且韻項天竺山多天長橋慶樂園有
數十株士大夫嘗往賞此奇香向東坡送花贈元素詩
云月闕霜濃細藥乾此花原屬桂堂仙鷺峯子落驚前
夜蟾窟枝空記昔年高宗在壽宮時賞桂嘗命畫工為
岩桂扇面仍製御詩分賜羣臣親王云秋入幽巖桂影

團香深粟粟照林丹應隨王母瑤池宴染得朝霞下廣
寒楊誠齋詠桂花詩云塵世何曾識桂林花仙夜入廣
寒深移將天上衆香國寄在梢頭一粟金露下風高月
當戶夢回酒醒客聞砧詩情惱得渾無那不為龍涎與
水沉華岳咏曰西風吹老碧蓮房萬壑風流圻麝囊謾
與籬花爭晚色肯教盆蕙壓秋芳月中有女曾分種世
上無花敢鬪香要識仙根迴然別一枝開傍御家牆詠
落英詩淨掃庭堦襯落英西風吹恨入蓬瀛人從紫麝

囊中過馬在黃金屑上行眠醉不須鋪錦褥妍香還解
作珠纓宮娥未許填溝壑收拾流蘇浸玉罌 山茶

磬口茶 玉茶 千葉多心茶 秋茶 東西馬塍色

品頗盛栽接一本有十色者有早開而晚發大率變物
之性盜天之氣雖時亦可違他花往往皆然頃有接花
詩云花單可使千色黃果奪天之造化 木芙蓉 蘇

堤兩岸如錦湖水影而可愛秋日如霞錦內庭亦有芙
蓉閣盛開如錦紫巖詠芙蕖詩云為惜艷陽妝新枝不

青長綠深秋後雨紅坼夜來霜偏向垂楊岸多臨古岸
旁年年根蒂在

闕

藥之品

雲母 藁本 茵芋 鬼田 木鼈 以上本草載杭

州所有 地黃 牛膝 仁和繭橋白石種 乾薑

上件並歲貢 蛇床子 白石生 躑躅花根名天門冬

生錢塘富陽 白芷 千金草 繭橋生 威靈仙

茱萸 澤蘭 鬼箭 烏藥 鈎藤 覆盆子 麥

門冬 白及 牽牛 地骨皮 牛蒡 地膚 百合

香附子 乾葛 並出富陽 木通 何首烏 劉

寄奴 生富陽小井 藜蘆 草烏 秦皮 百部根

生天目山 菖蒲 生桑 白皮 芍藥 荊芥 薄

荷 紫蘇 天南星生於潛昌化 天花粉 即瓜蒌根 馬

兜鈴白皮 白解皮 石竹子耀山蘋 黃精 生於

潛餘杭山 枸杞 茯苓 半夏 貫衆 地扁蓄

苦練皮 益母草 生龍井山谷 山豆根 牡丹

皮 車前子 石膏 錢塘縣西有山出如雪瑩白舊

縣治亥地有獄產此 寒水石南高峯塔下生軟者寒

水硬者石膏 蒲黃 榆白皮 鳳眼草 金星草

生南高峯 黃皮生於潛及雷峯塔下 石燕 九色

山洞中皆有之 枳實 續斷 青蒿子 香薷 千

年潤 土人呼為地蜈蚣草 石香薷

禽之品

雀宋書云鹽官屬有白雀之異 鷩雞 有數種山

鷓鴣

亦名鷓鴣

錯沙

魚虎

章雞

白頭翁

烏頭白頰

蠟嘴

告天

杜鵑沈樂山咏云到得春深便憶鄉要

歸歸去底須忙催

闕

壟月情何切染遍林花恨更長夢

破四山風雨夜心灰萬里利名場為言蜀道今非昔縱

使歸來亦斷腸

布穀

畫眉

百舌林和靖詩云

百種堪憐好言語一般惟欠好毛衣

婆餅焦

提壺

和靖過下湖別墅詩多謝提壺鳥留人到落暉

黃雀

鷓鴣

和靖春日即事詩駕鴛如綺杜衡肥鷓鴣夷

猶翠澹微 偷倉 家鷓 八歌兒 披綿 鷺鷥邵

棠咏云如鷗非鶴自精神天地江湖快爾生既不鷗吟

因甚瘦何嘗食素也能清隨身釣具去無計緊到處畫

圖來便成見說得魚歸較晚蘆花灘上月偏明徐靈祐

咏鷺詩云一點白如雪頂粘絲數莖沙邊行有迹空外

過無聲高柳巢方穩危灘立不驚每看閒意思漁父是

前生 鈎輶和靖詩云雲木叫鈎輶 野鳬

獸之品

馬昔吳越錢王牧馬於錢塘門外東西馬塍其馬蕃息
至盛號為馬海今餘杭臨安於潛三邑猶有牧馬遺蹟
豕 牛 鹿 虎 狐 狸 麕 係牛尾玉面生於
昌化於潛山中有之 兔 獺 猫都人畜之捕鼠有
長毛白黃色者稱曰獅猫不能捕蟲以為美觀多府第
貴官諸司人畜之特見貴愛 犬為警盜太平廣記載
靈隱寺造北高峯塔有寺犬自山下銜磚石至山巔吻
為流血人憐之以草繫磚於背塔成犬斃寺僧恤銜磚

之功葬於寺門八面松下 又錢塘縣界地名狗葬橋
名良犬故老相傳云昔人被火燎幾斃犬入水以濡其
主得蘇省後犬死里人葬之立此名旌其義耳

蟲魚之品

鯉 鯽西湖產者骨軟肉鬆 鰕獨西湖無此種 鱮

鰩 鱧 魴 鱸 鱸 鰱 鮎 黃頰 白頰

石首王右軍帖云此魚首有石是野鴨之化

蒲春鼈
 藻
 魴
 白
 鮓
 六和塔江邊生極鱗腴

而肥江北者味差減 鯢 鮓 鰱 鰻 鰻

蚌 龜 鼈又名神守 鰕湖河生者殼青江產者名

白鰕大者名青斑鰕 蝓蚌 黃甲 蟛蜞 彭蜆產

鹽官 蟹淮南子云蚌蟹珠龜與月盛衰皆陰屬也西

湖舊多葑田蟹鼈產之今湖中官司開圻蕩地艱得矣

和靖詩有草泥行郭索之句劉貢父詩云稻熟水波老

霜螯已上罾味尤堪薦酒香美最宜橙殼薄臙脂染膏

腴琥珀凝情知烹大鼎何似莫橫行 蠃 蜆 蛤

螺有數種螺蛳海螺田螺海蛳 金魚有銀白玳瑁色

者東坡有詩云我識南屏金鯽魚又曰金鯽池邊不見
君則此色魚舊亦有之今錢塘門外多蓄養入城貨賣
名魚兒活豪貴府第宅舍作池蓄之青芝塢玉泉池中
盛有大者且水清泉湧巨魚汎遊堪愛

免本州歲納及苗稅

杭州乃吳分野號古揚州昔武肅錢王統二浙地狹民
稠賦斂苛暴人不堪生太宗朝納土後命考功范旻知

兩浙諸州事鎮撫除一切苦虐之政蠲損害之賦民得
更生四野老稚咸鼓舞於德意之中紹興年間六飛南
渡寬恩大頒首除歲貢御綾百疋景定年間度宗踐阼
之初首遵先朝遺志蠲免臨安府近例歲貢增添納進
錢一百一十五萬八千五百四十貫有奇更有累政帥
臣申錢塘仁和兩赤縣寺觀府第官舍撥賜田地免徵
折帛苗糧及冊逃虧賦等苗歲淳歲九縣畸零稅絹除
赦文蠲免一尺以外尹京潛皋墅更與本州代輸一尺

以上絹疋零稅色計一十四萬六千五百七十一人有
奇紐該界錢十八界會子計三萬四千四百八十貫文
又苗米不及一升者朝家已行蠲放外其一升以下至
一斗以下秋苗米本州代輸寬民力通計八千八百一
石有奇紐該價錢十八界二十六萬九千闕百五十貫
更代輸咸淳七年本州夏稅疋零錢共該十八界四十
六萬七千六百四貫潛尹京首尾三載代輸頗多誠有
德於百姓深足嘉尚矣

免本州商稅

杭州五稅場自趙安撫節齋申請減放外一歲共收十八界會四十二萬貫為定額景定改元以來朝家務欲平物價紓寬民力累降旨蠲免商稅仍令本州具合收稅額申省科還咸淳二年二月又降指揮再免商稅五日以便商賈自後帥府遵承朝旨接續展放蠲免稅額常以五月為期朝省每五月一次照本府征額撥一十八界一十七萬五千貫文以補郡費至今行之百姓與

商賈人等莫不歌舞感戴上賜此歷代所罕有也

恩霈軍民

宋朝行都於杭若軍若民生者死者皆蒙雨露之恩但霈澤常頒難以枚舉姑述其一二焉遇朝省祈晴請雨禱雪求瑞或降生及聖節日分淫雨雪寒居民不易或遇慶典大禮明堂皆頒降黃榜給賜軍民各關會二十萬貫文蓋杭郡乃駐蹕之所故有此恩例耳兼官私房屋及基地多是賃居還餉金或出地錢但屋地錢俱分

大中小三等錢如遇前件祈禱恩典官私出榜除放房地錢大者三日至七日中者五日至十日小者七日至半月如房舍未經減者遇大禮明堂赦文條畫謂一貫為減除三日止令公私收七百或年歲荒歉米價頓窮官私置立米場以官米賑濟或量收價錢務在實惠及民更因熒惑為災延燒民屋官私差官吏於火場上具抄被災之家各家老小隨口數分大小給散錢米官置柴場城內外共設二十一場許百司官廳及百姓從便

收買價錢官司量收與市價大有饒潤民有疾病州府
置施藥局於戒子橋西委官監督依方修製丸散吹咀
來者疹視詳其病源給藥醫治朝家撥錢一十萬貫下
局令帥府多方措置行以賞罰課督醫員月以其數上
其州家備申朝省或民以病收投局則畀之藥必奏更
生之效局側有局名慈幼官給錢典雇乳婦養在局中
如陋巷貧窮之家或男女幼而失母或無力撫養拋棄
於街坊官收歸局養之月給錢米絹布使其飽煖養育

成人聽其自便生理官無所拘若民間之人願收養者聽官仍給月錢一貫米三斗以三年住支更有老疾孤寡貧乏不能自存及丐者等人陳請於朝委仁和錢塘縣官以病坊改作養濟院籍家姓名每名官給錢米贍之此見朝家恤貧救老如此又殿步馬三司養軍以護行都及秋防之備月給錢糧春冬請衣綿使之飽煖遇有差出日給口券成功則賞如三司招軍補額之時每刺一卒官給闕會一二封衣裝七事件則出軍先散處

發關會及衣裝則軍妻老幼月支贍家米糧隨軍日支
券糧功成則轉資給犒如陣亡官給津送妻兒仍支贍
孀幼之糧更有兩縣置漏澤園一十二所寺菴寄留槥
積無主者或暴露遺骸俱瘞其中仍置屋以為春秋祭
奠聽其親屬享祀官府委德行僧二員主管月給各支
常平錢五貫米一石瘞及二百人官府保明申朝家給
賜紫衣師號賞之

恤貧濟老

杭城富室多是外郡寄寓人居蓋此郡鳳凰山謂之客
山其山高木秀背蔭及寄寓者其寄寓人多為江商海
賈穹桅巨舶安行於烟濤渺莽之中四方百貨不趾而
集自此成家立業者衆矣數中有好善積德者多是恤
孤念苦敬老憐貧每見此等人買賣不利坐困不樂觀
其聲色以錢物周給助其生理或死無週身之具者妻
兒因措莫能支吾則給散棺木助其火葬以終其事或
遇大雪路無行徑長幼啼號口無飲食身無衣蓋凍餓

於道者富家沿門觀察其孤苦艱難遇夜以碎金銀或錢會挿於門縫以周其苦俾侵晨開戶得之如自天降或散以紙被絮襖與貧丐者便暖其體如此賑於飢寒得濟合家感戴無窮矣俗諺云作善者降百祥天神祐之作惡者賜千災鬼神隨之天之報善罰惡甚於影響世人以此為鑒也

夢梁錄卷十八

欽定四庫全書

夢梁錄卷十九

宋 吳自牧 撰

園囿

杭州苑囿俯瞰西湖高挹兩峯亭館臺榭藏歌貯舞四
時之景不同而樂亦無窮矣然歷年既多間有興廢今
詳述之以為好事者之鑒在城萬松嶺內貴附王氏富
賢園三茅觀東山梅亭慶壽庵褚家塘東瓊花園清湖
北慈明殿園楊府秀芳園張府北園楊府風雪當作雲慶

會閣望仙橋下牛羊司側內侍蔣苑使住宅側築一圃
亭臺花木最為富盛每歲春月放人遊玩堂宇內頓放
買賣關撲並體內庭規式如龍船鬧竿花籃花工用七
寶珠翠奇巧裝結花朵冠梳並皆時樣官窰椀櫟闕古

玩具鋪列堂右倣如關撲歌叫之聲清婉可聽湯茶巧
細車兒排設進呈之器桃村杏館酒肆裝成鄉落之景
數畝之地觀者如市城東新門外東御園即富景園頃
孝宗奉憲聖皇太后嘗遊幸五柳園即西園張府七位

曹園南山長橋慶樂園舊名南園隸賜福邸園内有十
樣亭榭工巧無二俗云魯班造者射圃走馬廊流盃池
山洞堂宇宏麗野店村莊裝點時景觀者不倦内有關
門名凌風關下香山巍然立於關前非古沉即枯枿木
耳蓋考之志其聞見錄所載者誤矣淨慈寺南翠芳園
舊名屏山園内有八面亭堂一片湖山俱在目前雷峯
塔寺前有張府真珠園内有高堂極其華麗塔後謝府
新園即舊甘內侍湖曲園羅家園白蓮寺園霍家園方

家塢劉氏園北山集芳園四聖延祥觀御園此湖山勝
景獨為冠頃有侍臣周紫芝從駕幸後山亭曾賦詩云
附山結真祠朱門照湖水湖流入中池秀色歸淨几風
簾遂旌幢神衛森劍履清芳宿華殿瑞霧蒙玉宸彷彿
懷神京想像輪奐美祈年開新宮祝釐奉天子良辰後
難會歲暮得斯喜洲乃清樾中飛樓見十里霜車儻可
乘吾事茲已矣便當賦遠遊未可回覆齒園有涼堂巍
然在山巔後改為西太乙宮黃庭殿向朝臣高似孫曾

賦詩曰水明一色抱神洲雨壓輕塵不敢浮山北山南
人喚酒春前春後客凭樓射熊館暗花扶宸下鵝池深
柳拂舟白首都人能道舊君王曾奉上皇遊下竺寺園
錢塘門外九曲墻下擇勝園錢塘正庫側新園城北隱
秀園菩提寺後謝府玉壺園四井亭園昭慶寺後古柳
林楊府雲洞園西園楊府具美園飲綠亭裴府山濤園
葛嶺水仙廟西秀野園集芳園為賈秋壑賜第耳趙秀
王府水月園張府凝碧園孤山路張內侍總宜園西林

橋西水竹院落裏湖內諸內侍園圃樓臺森然亭館花
木艷色奪景白公竹閣瀟洒清爽沿堤先賢堂三賢堂
湖山堂園林茂盛裝點湖山九里松嬉遊園湧金門外
隄北一清堂園顯應觀兩齋堂觀南聚景園孝光寧三
帝嘗幸歲久蕪圯僅存者一堂兩亭耳堂扁曰鑑遠亭
曰花光一亭無扁植紅梅有兩橋曰柳浪曰學士皆粗
見大槩惟夾徑老松益婆婆娑每盛夏秋首芙蓉遠隄如
錦遊人艤舫賞之頃有侍從陸游舟過作詩詠曰聖主

愛民罷露臺春風別苑晝常開
盡除曼行魚龍戲不禁
芻蕘雉兔來水鳥避人橫翠靄
宮花經雨委蒼苔殘年
自喜身強健又作清都夢一回
又水殿西頭起砌臺綠
楊開處杏花開簫韶本與人同
樂羽衛纔聞歲一來鷁
首波先涵藻荇金鋪雨後上莓
苔遠臣侍宴應無日日
望堯雲到晚回高似孫遊園詠
曰翠華不向苑中來可
是年年惜露臺水際春風寒漠
漠官梅却作野梅開張
府泳澤環碧園舊名清暉園大
小漁莊其餘貴府內官

沿堤大小園圃水閣涼亭不堪其數御前宮觀俱有內苑以備車駕臨幸憩足之處內東太乙宮有內苑後一小山名曰武林山即杭州城主山也宰臣樓鑰曾賦長篇詠云易君求賦武林山身困塵勞無暫閒我求掛冠欲歸去念此詩債須當還武林山出武林水靈隱後山無乃是此山亦復用此名細考其來真有以天目兩乳到錢塘一山環湖萬龍翔扶輿磅礴擁王氣皇居壯麗環宮墻湖陰一峯如怒猊勢臨城北尤瑰奇吳越大作

緇黃廬為穿百井以厭之從來有龍必有珠此雖培塿
千山餘中興南渡為行都崇列原廟太乙廬曾因祠事
來登眺闌闌塵中有員嶠薰風時來洗泮暑綠樹陰陰
隱殘照我得暫來猶醒心羨君清福住年深長安信美
非吾土倦翼惟思歸故林城南則有玉津園在嘉會門
外南四里紹興年間虜使來賀高宗天申聖節遂宴射
其中孝宗常臨遊幸翫會命皇太子宰執親王侍從五
品以上官及管軍官講宴射禮孝宗御製詩賜皇太子

以下官曰一天秋色破寒煙別禦連隄壓巨川欣見歲
功成萬寶因行射禮命群賢騰騰喜氣隨飛羽嫋嫋淒
風入控弦文武從來資並用酒餘端有侍臣篇時光宗
在東宮侍駕恭和曰秋深欲曉斂輕煙翠木森圍萬里
川閭闔啓關開法駕玉津按武會英賢皇皇聖父明如
日挺挺良賢直似弦蹈舞歡呼稱萬歲未饒天保報恩
篇宰臣曾懷恭和曰名園佳氣靄非煙冠佩朝宗似百
川五品並令陪宴射四鍤端欲序賓賢恩涵春意魚翻

藻威入秋聲鴈落弦竢事更容窺典雅宸章應陋栢梁
篇又江山秋日冠輕煙別院風光勝輞川位設虎侯恢
盛典技精楊葉拔名賢禮均湛露宣飛鞀樂奏鈞天看
發弦聖主經文兼緯武全勝巡幸射蛟篇餘羣臣俱有
恭和詩不悉載 史魏王彌遠出判寧國府理廟命
宰執侍從於此園設燕餞行有朝官胡銓賦詩曰餞行
朱邸帝城春隨例顛忙宴玉津報國獨勞千一慮鈞天
同聽十三人金卮宣勸君王重花露湔愁醉夢真却憶

故人猿鶴在便思投老乞其身按玉津園乃東都舊名東坡嘗賦詩有紫壇南峙表連岡之句蓋亦密通園壇也嘉會門外有山名包家山內侍張侯壯觀園王保生園山上有關名桃花關舊扁蒸霞兩帶皆植桃花都人春時遊者無數為城南之勝境也城北西門外趙郭園又有錢塘門外溜水橋東西馬塍諸圃皆植怪松異檜四時奇花精巧窠兒多為龍蟠鳳舞飛禽走獸之狀每日市于都城好事者多買之以備觀賞也

瓦舍

瓦舍者謂其來時瓦合出時瓦解之義易聚易散也不知起於何時頃者京師甚為士庶放蕩不羈之所亦為子弟流連破壞之門杭城紹興間駐蹕於此殿岩楊和王因軍士多西北人是以城內外初立瓦舍招集伎樂以為軍卒暇日娛戲之地今貴家子弟郎君因此蕩遊破壞尤甚於汴都也其杭之瓦舍城內外不下十有七處如清冷橋西熙春樓下謂之南瓦子市南坊北三元

樓前謂之中瓦子市西坊內三橋巷名大瓦子舊呼上
瓦子衆安橋南羊棚樓前名下瓦子舊呼北瓦子鹽橋
下蒲橋東謂之蒲橋瓦子又名東瓦子今廢為民居東
青門外菜市橋側名菜市瓦子崇新門外章家橋南名
薦橋門瓦子新開門外南名新門瓦子舊呼四通館保
安門外名小堰門瓦子候潮門外北首名候潮門瓦子
便門外北謂之便門瓦子錢湖門外南首省馬院前名
錢湖門瓦子亦廢為民居後軍寨前謂之赤山瓦子靈

隱天竺路行春橋側曰行春瓦子北郭稅務是北郭瓦子又名大通店米市橋下米市橋瓦子石牌頭北麻線巷內則曰舊瓦子

塌房

柳永詠錢塘詞曰參差十萬家此元豐前語也自高宗車駕自建康幸杭駐蹕幾近二百餘年戶口蕃息近百萬餘家杭城之外城東西南北各樓十里人煙生聚民物阜蕃市井坊陌鋪席駢盛數日經行不盡各可此外

路一州郡足見杭城繁盛耳且城郭內北關水門裏有水路週迴數里自梅家橋至白洋湖方家橋直到法物庫市舶前有慈元殿及富豪內侍諸司等人家於水次起造塌房數十所為屋數千間專以假貨與市郭間鋪席宅舍及客旅寄藏物貨并動具等物四面皆水不惟可避風燭亦可免偷盜極為利便蓋置塌坊家月月取索假貨者管巡廊錢會雇養人力遇夜巡警不致疎虞其他州郡如荆南沙市太平州黃池皆客商所聚雖云

浩繁亦恐無此等穩當房屋矣

社會

文士有西湖詩社此乃行都縉紳之士及四方寓流
儒人寄興適情賦詠膾炙人口流傳四方非其他社
集之比武士有射弓踏弩社皆能攀弓射弩武藝精
熟射放心親方可入此社耳更有蹙鞠打毬射水弩
社則非仕宦者為之蓋一等富室郎君風流子弟與
閒人所習也奉道者有靈寶會每月富室當供持誦

正一經卷如正月初九日玉皇上帝誕日杭城行香諸富室就承天觀閣上建會北極佑聖真君聖降及誕辰士庶與羽流建會於宮觀或於舍庭誕辰日佑聖觀奉
上旨建醮士庶炷香紛然諸寨建立聖殿者俱有社會
則諸行亦有獻供之社遇三元日諸琳宮建普度會廣
廣幽冥二月初三日梓潼帝君誕辰川蜀仕宦之人就
觀建會三月二十八日東嶽誕辰四月初六日城隍誕
日二月初八日霍山張真君聖誕四月初八日諸社朝

五顯王慶佛會九月二十九日五王誕日每遇神聖誕
日諸行市戶俱有社會迎獻不一如府第內官以馬為
社七寶行獻七寶玩具為社又有錦體社臺閣社窮富
賭錢社遇雲社女童清音社蘇家巷傀儡社青果行獻
時果社東西馬塍獻異松怪檜奇花社魚兒活行以異
樣龜魚呈獻豪富子弟緋綠清音社十閤等社有內官
府第以精巧雕鏤筠籠養畜奇異飛禽迎獻者謂為可
觀遇東嶽誕日更有錢燔社重囚加願社也奉佛者有

上天竺寺光明會俱是富豪之家及大街鋪席施以大
燭巨香助以齋貲供米廣設勝會齋僧禮懺三日作大
福田又有善女人皆府室宅舍內司之府第娘子夫人
等建庚申會誦圓覺經俱戴珠翠珍寶首飾赴會人呼
曰關寶會更有城東城北善友道者建茶湯會遇諸山
寺院建會設齋及神聖誕日助緣設茶湯供衆四月初
八日六和塔寺集童男童女善信人建朝塔會九月初
一日湖州寺遇土神崇善王誕日亦以童男童女迎獻

茶還心懷每月遇庚申日或八日諸寺庵舍集善信人
誦經設齋或建西歸會寶叔塔寺每歲春季建受生寄
庫大齋會諸寺院清明建供天會七月十五日建盂蘭
盆會二月十五日長明寺及諸教院建涅槃會四月八
日西湖放生池建放生會頃者此會所集數萬人耳太
平興國傳法寺向者建淨業會每月十七日集善男信
人十八日集善女信人入寺誦經設齋聽法年終以所
收貲金建藥師道場七晝夜以終其會今廢之久矣其

餘白蓮行法三壇等會各有所日分也

閒人

閒人本食客人孟嘗君門下有三千人皆客矣姑以今時府第宅舍言之食客者又訓導蒙童子弟者謂之館客又有講古論今吟詩和曲圍棋撫琴投壺打馬撒竹寫蘭名曰食客此之謂閒人也更有一等不著業藝食於人家者此是無成子弟能文知書寫字善音樂今則百藝不通精專陪涉富豪子弟郎君遊宴執役甘為下

流及相伴外方官員財主到都營幹又有猥下之徒與
妓館家書寫簡帖取送之類更專以參隨服役之生舊
有百業皆通者如紐元子學像生叫聲教蟲蟻動音樂
雜手藝唱詞白話打令商謎弄水使拳及善能取覆供
過傳言送語又有專為棚頭關黃頭養百蟲蟻促織兒
又謂之閑漢凡擎鷹架鷄調鴉鴿關鴿鶻雞雞賭撲落
生之類又有一等手作人專攻刀鐮出入宅院趨奉郎
君子弟專為幹當雜事插花掛畫說合交易幫涉妄作

謂之涉兒蓋取過水之意更有一等不本色業藝專為探聽妓家賓客趕赴唱喏買物供過及遊湖酒樓飲宴所在以獻香送勸為由乞覓贍家財謂之廝波大抵此輩若顧之則貪婪不已不顧之則強顏取奉必滿其意而後已但看賞花宴飲君子出著發放何如耳

雇覓人力

凡雇倩人力及幹當人如解庫堂事貼窓鋪席主管酒肆食店博士鏜頭行菜過買外出髻兒酒家人師公大

伯等人又有府第宅舍內諸司都知太尉直殿御藥御帶內監寺廳分雇覓大夫書表司廳子虞候押番門子直頭轎番小厮兒廚子火頭直香燈道人園丁等人更有六房院府判提點五房院承旨太尉諸內司殿管判司幕士六部朝奉雇倩私身轎番安童等人或藥鋪要當鋪郎中前後作藥生作下及門面鋪席要當鋪裏主管後作上門下簪當直安童俱各有行老引領如有逃閃將帶東西有元地脚保識人前去跟尋如府宅官員

豪富人欲買寵妾歌童舞女廚娘針線供過簾細婢
妮亦有官私牙嫂及引置等人但指揮便行踏逐下來
或官員士夫等人欲出路還鄉上官赴任游學亦有出
陸行老雇倩脚夫卻從承攬在途服役無有夫節

四司六局筵會假賃

凡官府春宴或鄉會或遇鹿鳴宴文武官試中設同年
宴及聖節滿散祝壽公筵如遇宴席官府客將人吏差
撥四司六局人員督責各有所掌無致苟簡或府第齋

舍亦於官司差借執役如富家士庶吉筵凶席合用椅
桌陳設書畫器皿盤盒動事之數則雇喚局分人員俱
可完備凡事毋苟且謂四司六局所掌何職役開列於
後如帳設司專掌仰塵錄壓桌圍搭席簾幕繳額果恩
屏風書畫簇子畫帳等如茶酒司官府所用名賓客司
掌賓客過茶湯斟酒上食喝揖而已則民庶等客俱用
茶酒司掌管筵席合用金銀酒茶器具及直茶湯煖盞
斟酒請坐諮席開話斟酒食上唱揖唱坐席迎送親姻

吉筵慶壽邀賓筵會喪葬齋筵脩設僧道齋供傳語取
覆上書請客送聘禮合成姻禮儀先次迎詩等事廚司
事前後掌筵生熟看食教飭合食前後筵九盞食品坐
歇坐泛勸品件放料批切調和精細美味美湯精巧簇
花龍鳳勸盤等事臺盤司掌把盤打送賁擎勸盤出食
椀櫟等果子局掌裝簇飭盤看果時新水果南北京果
海腊肥脯醬切像生花果勸酒品件蜜煎局掌簇飭看
盤果套山子蜜煎像生窠兒菜蔬局掌筵上簇飭看盤

菜蔬供筵泛供異品菜蔬時新品味糟藏像生件段等
油燭局掌燈火照耀上燭修燭點照壓燈辦集立臺手
肥豆臺竹籠燈臺裝火簇炭香藥局掌管龍涎沉腦清
和清福異香香壘香爐香毬裝香簇畫細灰效事聽候
換香酒後索喚異品醒酒湯藥餅兒排辦局掌椅桌交
椅桌櫬書桌及洒掃打渲拭抹供過之職蓋四司六局
等人祇直慣熟不致失節省主者之勞也欲就名園異
館寺觀亭堂或湖舫會賓但指揮局分水立可辦集皆

能如儀俗諺云燒香點茶掛畫插花四般閑事不宜戾
家若有失節者是祇役人不精故耳且如筵會不拘大
小或衆官筵上唱搗亦有次第先茶酒次廚司三伎樂
四局分五本主人從此雖末事因筆述之耳

夢梁錄卷十九

欽定四庫全書

夢梁錄卷二十

宋 吳自牧 撰

嫁娶

婚娶之法先憑媒氏以草帖子通於男家男家以草帖問卜或禱籤得吉無尅方回草帖亦卜吉媒氏通音然後過細帖又謂定帖帖中敘男家三代官品職位名諱議親第幾位男及官職年甲月日吉時生父母或在堂或不在堂或書主婚何位尊長或入贅明謝將帶金銀

田土則產宅舍房廊山園俱列帖子內女家回定帖亦如前開寫及議親第幾位娘子年甲月日吉時生具列房奩首飾金銀珠翠寶器動用帳幔等物及隨嫁田土屋業山園等其伐柯人兩家通報擇日過帖各以色綵襯盤安定帖送過方為定論然後男家擇日備酒禮詣女家或借園圃或湖舫內兩親相見謂之相親男以酒四盃女則添備雙盃此禮取男強女弱之意如新人中意即以金釵插於冠髻中名曰插釵若不如意則送綵

段二足謂之壓驚則姻事不諧矣既已插釵則伐柯人
通好議定禮往女家報定若豐富之家以珠翠首飾金
器銷金褰裙及段足茶餅加以雙羊牽送以金餅酒四
尊或八尊裝以大花銀方勝紅綠銷金酒衣簇蓋酒上
或以羅帛貼套花為酒衣酒擔以紅綵綴之男家用銷
金色紙四幅為三啓一禮物狀共兩封名為雙緘仍以
紅綠銷金書袋盛之或以羅帛貼套五男二女綠盞盛
禮書為頭合共輦十合或八合用綵袱蓋上往送女家

接定禮合於宅堂中備香燭酒果告盟三界然後請女親家夫婦雙全者開合其女氏即於當日備回定禮物以紫羅及顏色段疋珠翠鬚掠皂羅巾段金玉帕鏤七寶巾環篋帕鞋襪女工答之更以原送茶餅果物以四方回送羊酒辦以一半回之更以空酒尊雙枚入清水盛四金魚以筋一雙葱兩株安於尊內謂之回魚筋若以富家官戶多用金銀打造魚筋一闕並以綵帛造像生葱雙株掛於魚水尊外答之自送定之後全憑媒

氏往來且望傳語遇節序亦以冠花綵段合物酒果遺
送謂之追節女家以巧作女工金寶帕環笞之次下則
送聘預令媒氏以醵酒重則羊酒道日方行送聘之禮
且論聘禮富貴之家常備三金送之則金釧金釵金帔
墜者是也若以鋪席宅舍或無金器以銀鍍代之否則
貧富不同亦從其便此無定法耳更言仕宦亦送銷金
大袖黃羅銷金裙段紅長裾或紅素羅大袖段亦得珠
翠闕特髻珠翠圓冠四時冠花珠翠排環等首飾及上

細雜色綵段疋帛加以花茶果物團圓餅羊酒等物及送官會銀鋌謂之下財禮亦用雙緘聘啓禮狀或下等人家所送一二疋官會一二封加以鷺酒茶餅而已若下財禮則女氏得以助其虛費耳又有一等貧窮父母兄姐所倚者雖色可取而奩具茫然在議親者以首飾衣帛加以褚物送往謂之兜裏今富家女氏既受聘送亦以禮物答回以綠紫羅疋綵色段疋金玉文房玩具珠翠鬚掠女工等如前禮物更有媒氏媒箱段疋盤醖

官褚花紅禮合惠之自聘送之後節序不送擇禮成吉日再行道日禮報女氏親迎日分先三日男家送催粧花髻銷金蓋頭五男二女花扇花粉盥洗項畫綵錢果之類女家答以金銀雙勝御羅花幙頭綠袍靴笏等物前一日女家先往男家鋪房掛帳幔鋪設房奩器具珠寶首飾動用等物以至親壓鋪房備禮前來煖房又以親信婦人與從嫁女使看守房中不令外人入房須待新人來方敢縱步往來至迎親日男家刻定時辰預令

行郎各以執色如花餅花燭香毬紗羅洗漱粧盒照臺
裙箱衣匣百結青涼傘交椅授事街司等人及崔借官
私妓女乘馬及和倩樂官鼓吹引迎花擔子或樓擔花
勝轎前往女家迎取新人其女家以酒禮款待行郎散
花紅銀牒利市錢會訖然後樂官作樂催粧尅擇官報
時辰催促登車茶酒互念詩詞催請新人出閣登車既
已登車擎擔從人未肯起步仍念詩詞求利市錢酒畢
方行起擔作樂迎至男家門首時辰將正樂官妓女及

茶酒等人互念詩詞攔門求利市錢紅尅擇官執花斛
盛五穀豆錢綵果望門而撒小兒爭拾之謂之撒穀豆
以壓青陽煞耳方請新人下車一妓女倒朝行車捧鏡
又以數妓女執蓮炬花燭導前迎引遂以二親信女使
左右扶持而行踏青錦褥或青氍毹花席上行先跨馬鞍
草平秤過入中門至一室中少歇當中懸帳謂之坐虛
帳或徑迎入房室內坐於床上謂之坐床富貴其家委
親戚接待女家親戚及親送客會陽次拂備酒四盞款

待若論浙東以親送客急三盃或五盃而回名曰走送
向者迎新郎禮其婿服綠裳花幘頭於中堂升一高座
先以媒氏或親戚互斟酒請下高座歸房至外姑致請
方下坐回房坐富貴今此禮久不用矣止用妓樂花燭
迎引入房房門前先以綵一段橫挂於楣上碎裂其下
婿入門衆手爭扯而去謂之利市繳門爭求利市也婿
登床右首坐新婦坐左首正坐富貴禮也其禮官請兩
新人出房謂中堂參堂男執槐簡掛紅綠綵綰雙同心

結倒行女掛於手面相向而行謂之牽巾並立堂前遂請男家雙全女親以秤或用機杼挑蓋頭方露花容參拜堂次詣家神及家廟行參諸親之禮畢女復倒行執同心結牽新郎回房講交拜禮再坐床禮官以金銀盤盛金銀錢綵錢雜果撒帳次命妓女執雙盃以紅綠同心結綰盞底行交盞禮畢以盞一仰一覆安於床下取大吉利意次男左女右結髮名曰合髻又男以手關女之花女以手解郎綵拋紐次擲花髻於床下然後請掩

帳新人換粧畢禮官迎請兩新人詣中堂行參謝之禮
次親朋講慶賀及參謁外舅姑已畢則兩親家行新親
之好然後入禮筵行前筵五盞禮畢別室歇坐數盃勸
色以叙親義仍行上賀賞花節次仍復再入公筵飲後
筵四盞以終其儀三日女家送冠花綵段鶯蛋以金銀
缸兒盛油蜜頓於盤中四圍撒貼套丁膠於上並以茶
餅鶯羊果物等合送去壻家謂之送三朝禮也其兩新
人於三日或七朝九日往女家行拜門禮女親家廣設

華筵款待新壻名曰會郎亦以上賀禮物與其壻禮畢
女家備鼓吹迎送壻回宅第女家或於九朝內移廚往
壻家致酒謂之煥女會自後取女回家以冠花段疋合
食之類送歸壻家謂之洗頭至一月女家送彌月禮合
壻家開筵延款親家及親眷謂之賀滿月會親自此禮
儀相簡遇節序兩親互送節儀若士庶百姓之家貧富
不等亦宜隨家豐儉却不拘此禮若果無所措則已之

育子

杭城人家育子如孕婦八月初月初外舅姑家以銀盆
或綵盆盛粟桿一束上以錦或紙蓋之上簇花朵通草
貼套五男二女意思及眠羊卧鹿併以綵畫鴨鰲一百
二十枚膳食羊生棗栗果及牙兒綉綳綵衣送至婿家
名催生禮足月既坐蓐分娩親朋爭送細米炭醋三朝
與兒落臍灸顙七日名一臘十四日謂之二臘廿一日
名曰三臘女家與親朋俱送膳食如猪腰肚蹄脚之物
至滿月則外家以綵畫錢或金銀錢雜果及送綵段珠

翠顙角兒食物等其家大展洗兒會親朋俱集煎香湯
於銀盆內下洗兒果綵錢等仍用色綵繞盆謂之圍盆
紅尊長以金銀釵攪水名曰攪盆釵親賓亦以金錢銀
釵撒於盆中謂之添盆盆內有立棗兒少年婦爭取而
食之以為生男之徵浴兒落胎髮畢以髮入金銀小合
盛以色線結絡之抱遍謝諸親坐客及抱入姆孀房中
謂之移窠若富室宦家則用此禮貧下之家則隨其儉
法則不如宜也生子百時即一百日亦開筵作慶至來

歲得周名曰周晬其家羅列錦席於中堂燒香炳燭頌
果兒飲食及父祖誥勅金銀七寶玩具文房書籍道釋
經卷稱尺刀剪升斗等子綵段花朵官楮錢陌女工針
線應用物件并兒戲物卻置得周備小兒於中座觀其
先拈者何物以為佳識謂之拈週試晬其日諸親饋送
開筵以待親朋

妓樂

散樂傳學教坊十三部唯以雜劇為正色舊教坊有箏

簾部大鼓部拍板色歌板色琵琶色箏色方響色笙色
龍笛色頭管色舞旋色雜劇色參軍等色但色有色長
部有部頭上有教坊使副鈐轄都管掌儀掌範皆是雜
流命官其諸部諸色分服紫緋綠三色寬衫兩下各垂
黃義襴雜劇部皆渾裹餘皆幘頭帽子更有小兒隊女
童採蓮隊其外別有鈞容班人四孟乘馬從駕後動樂
者是也御馬院使臣凡有宣喚或御教入內承應奏樂
紹興年間廢教坊職名如遇大朝會聖節御前排當及

駕前導引奏樂並撥臨安府衙前樂人屬脩內司教樂所集定姓名以奉御前供應向者汴京教坊大使孟角球曾做雜劇本子葛守成撰四十大曲丁仙現捷才知音南渡以後教坊有丁漢弼楊國祥等景定年間至咸淳歲衙前樂撥充教樂所都管部頭色長等人員如陸恩顯時和王見喜何鴈喜王吉趙和金寶范宗茂傅昌祖張文貴侯端朱堯卿周國保王榮顯等且謂雜劇中末泥為長每一場四人或五人先做尋常熟事一段名

曰艷段次做正雜劇通名兩段末泥色主張引戲色分付副淨色發喬副末色打諢或添一人名曰裝孤先吹曲破斷送謂之把名大抵全以故事務在滑稽唱念應對通遍此本是鑒戒又隱於諫諍故從便踈露謂之無過蟲耳若欲駕前承應亦無責罰一時取聖顏笑凡有諫諍或諫官陳事上不從則此輩粧作故事隱其情而諷之於上顏亦無怒也又有雜扮或曰雜班又名經元子又謂之拔和即雜劇之後散段也項在汴京時村落

野夫罕得入城遂撰此端多是借裝為山東河北村叟
以資笑端今士庶多以從省筵會或社會皆用融和坊
新街及下瓦子等處散樂家女童裝束加以弦索賺曲
祇應而已大凡動細樂比之大樂則不用大鼓杖鼓羯
鼓頭管琵琶等每只以簫笙箏篋嵇琴方響其音韻清
且美也若合動小樂器只三二人合動尤佳如雙韻合
阮咸嵇琴合簫管箏琴合葫蘆琴或彈撥十四弦獨打
方響吹賺動鼓渤海樂一拍子至十拍子又有拍番鼓

兒敲水盞打鑼板和鼓兒皆是也街市有樂人三五為
隊擎一二女童舞旋唱小詞專沿街趕趁元夕放燈三
春園館賞翫及遊湖看潮之時或於酒樓或花衢柳巷
妓館家祇應但攜錢亦不多謂之荒鼓板若論動清音
比馬後樂加方響笙與龍笛用小提鼓其聲音亦清細
輕雅殊可人聽更有小唱唱叫執板慢曲曲破大率輕
起重殺匠謂之淺斟低唱若舞四十大曲皆為一體
但唱令曲小詞須是聲音軟美興叫果子唱耍令不犯

腔一同也

闕

朝廷御宴是歌板色承應如府第富

戶多於邪街等處擇其能謳妓女顧倩祇應或官府公筵及三學齋會縉紳同年會鄉會皆官差諸庫角妓祇直自景定以來諸酒庫設法賣酒官妓及私名妓女數內揀擇上中下者委有娉婷委媚桃臉櫻脣玉指纖纖秋波滴溜歌喉宛轉道得字真韻正令人側耳聽之不厭官妓如金賽蘭范都宜唐安安倪都惜潘稱心梅醜兒錢保奴呂作娘康三娘桃師姑沈三姐等及私名妓

女如蘇州錢三姐七姐文字李惜惜鼓板朱一姐媳婦
朱三姐呂雙雙十般大胡憐憐婺州張七姐蠻王二姐
搭羅丘三姐一丈白楊三媽舊司馬二娘裱褙陳三媽
履片張三娘半把傘朱七姐轎番王四姐大臂吳三媽
浴堂徐六媽沈盼盼普安安徐雙雙彭新等後輩雖有
歌唱者比之前輩終不如也說唱諸宮調昨汴京有孔
三傳編成傳奇靈怪入曲說唱今杭城有女流熊保保
及後輩女童皆效此說唱亦精於上鼓板無二也蓋嘌

唱為引子四句就入者謂之下影帶無影帶名為散呼
若不上鼓面止敲盞兒謂之打拍唱賺在京時只有纏
令纏達有引子尾聲為纏令引子後只有兩腔迎互循
環間有纏達紹興年間有張五牛大夫因聽動鼓板中
有太平令或賺鼓板即今拍板大節揚處是也遂撰為
賺賺者悞賺之之義也正堪美聽中不覺已至尾聲是
不宜為片序也又有覆賺其中變花前月下之情及鐵
騎之類今杭城老成能唱賺者如寶四官人離七官人

周行憲東西兩陳九郎包都事香沈二郎雕花楊一郎
招六郎沈媽媽等凡唱賺最難兼慢曲曲破大曲嘌唱
耍令番曲叫聲接諸家腔譜也若唱嘌耍令者如路歧
人王雙蓮呂大夫唱得音律端正耳今街市與宅院往
往做京師叫聲以市井諸色歌叫賣物之聲采合宮商
成其詞也

百戲伎藝

百戲踢弄家每於明堂郊祀年分麗正門宣赦時用此

等人立金雞竿承應上竿搶金雞兼之百戲能打筋斗
踢拳踏踉上索打交輓脫索索上擔水索上走裝鬼神
舞判官斫刀蠻牌過刀門過圈子等 理廟時有路岐

人名十將宋喜常旺兩家有踢弄人如謝恩張旺宋寶
歌沈家強自來強宋達楊家會宋賽歌宋國昌沈喜張
寶哥常家喜小娘兒李顯沈喜湯家會湯鐵住莊德劉
家會小來強鮑老兒宋定哥李成莊寶潘貴宋慶奇湯
家俊等遇朝家大朝會聖節宣押殿庭承應則官府公

筵府第筵會點喚供筵俱有大槁又有村落百戲之人
拖兒帶女就街坊橋巷呈百戲使藝求覓鋪席宅舍錢
酒之貲且雜手藝即使藝也如踢瓶弄碗踢磬踢缸踢
鐘弄花錢花鼓槌踢筆墨壁上睡虛空掛香爐弄花毬
兒撈築毬弄斗打硬教蟲蟻弄熊藏人燒大藏劍喫針
射弩端親背攢壺瓶等綿包兒撮米酒撮放生等藝淳
祐以後藝術高者有包喜陸壽施半仙金寶金時好宋
德徐彥沈興趙安陸勝包壽范春吳順金勝等此藝施

呈委是奇特藏去之術則手法疾而已凡傀儡敷演胭粉靈怪鐵騎公案史書歷代君臣將相故事話本或講史或作雜劇或如崖詞如懸線傀儡者起於陳平六奇計解圍故事也今有金線盧大夫陳中喜等弄得如真無二兼之走線者尤佳更有杖頭傀儡最是劉小僕射家數果奇大抵弄此多虛少實如巨靈神姬大仙等也其水傀儡者有姚遇仙賽寶哥王吉金時好等弄得百憐百悼兼之水百戲往來出入之勢規模舞走魚龍變

化奪真功藝如神更有弄影戲者元汴京初以素紙雕鏤自後人巧工精以羊皮雕形用以綵色粧飾不致損壞杭城有賈四郎王昇王閏卿等熟於擺布立講無差其話本與講史書者頗同大抵真假相半公忠者雕以正貌姦邪者刻以醜形蓋亦寓褒貶於其間耳

角觝

角觝者相撲之異名也又謂之爭交且朝廷大朝會聖節御宴第九盞例用左右軍相撲非市井之徒名曰內

等子隸御前忠佐軍頭引見司所管元於殿步諸軍選
膂力者充應名額即虎賁郎將耳每遇拜郊明堂大禮
四孟車駕親饗駕前有頂帽髻髮髻握拳左右行者
是也遇聖節御宴大朝會用左右軍相撲即此内等手
承應但内等子設額一百二十名内有管押人員十將
各二名上中等各五對下對八對劍捧手五對餘皆額
裏額外準備祇應三年一次就本司爭揀上名下次入
額其管押以下至額内等子亦三年一次當殿呈試相

撲謝恩賞賜銀絹外出職管押人員本司牒發諸州道
郡軍府充管營軍頭也前輩朝官曾赴御宴有詩詠曰
虎賁三百總威獰急颭旗催疊鼓聲疑是嘯風吟雨處
怒龍彪虎角虧盈蓋赤渠發也瓦市相撲者乃路岐人
聚集一等伴侶以圖標手之資先以女颭數對打套子
令人觀覩然後以膂力者爭交若論護國寺南高峯露
臺爭交須擇諸道州郡膂力高強天下無對者方可奪
其賞如頭賞者旗帳銀盆綵段錦襖官會馬匹而已項

於景定年間賈秋壑秉政時曾有温州子韓福者勝得
頭賞曾補軍佐之職杭城有周急快董急快王急快賽
關索赤毛朱超周忙憧鄭伯大鍊梢工韓通住楊長脚
等及女占賽關索鬘三娘黑四姐女衆俱瓦市諸郡爭
勝以為雄偉耳

小說講經史

說話者謂之舌辨雖有四家數各有門庭且小說名銀
字兒如胭脂粉靈怪傳奇公案扑刀桿棒發發踪泰之事

有譚淡子翁三郎雍燕王保義陳良甫陳郎婦棗兒余
二郎等談論古今如水之流談經者謂演說佛書說參
講者謂賓主參禪悟道等事有寶庵管庵喜然和尚等
又有說譚經者戴忻庵講史書者謂講說通鑑漢唐歷
代史書文傳興廢爭戰之事有戴書生周進士張小娘
子宋小娘子丘機山徐宣教又有王六大夫元係御前
供話為幕士請給講諸史俱通於咸淳年間敷演復華
篇及中興名將傳聽者紛紛蓋講得字真不俗記問淵

源甚廣耳但最畏小說人蓋小說者能講一朝一代故事頃刻間捏合與起令隨令相似各占一事也商謎者先用鼓兒賀之然後聚人猜詩謎字謎戾謎社謎本是隱語有道謎來客念思司語譏謎又打謎走智正猜來客索猜下套商者以物類相似者譏之又名對智貼套貼套思索橫下許旁人猜問因商者唱問包頭調與假作難猜以走其智杭之猜謎者且言之一二如有歸和尚及馬定齊記問博洽名傳久矣

欽定四庫全書

夢梁錄

夢梁錄卷二十